



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XII

BROJ: 203

DATUM: 29.05.2015.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Nermin Fatkić, viši saradnik za finansijska pitanja
fax: + 387 33 552 810
nermin.fatkić@sogfbih.ba

Sadržaj biltena:

U Općini Stari Grad održana sjednica dvije komisije Saveza

Predstavnici Saveza učestvovali u radu 10. skupštine NALAS-a

Uskoro posebna web stranica za investiranje u Kaknju

Potpisan sporazum o suradnji Općine G.Vakuf - Uskoplje i mađarske Općine Paks

Kako općine štede energiju: malim projektima do velikih ušteda

Održana konferencija: Kako živjeti sa poplavama?

Poziv općinskim / gradskim vijećima za kandidovanje najboljih praksi

U decembru sajam privrede, poljoprivrede, zanatstva i roba široke potrošnje

Najava obilježavanja dana općina i bitni datumi za Savez

Bilten Saveza općina i gradova Federacije Bosne i Hercegovine

U OPĆINI STARI GRAD ODRŽANA SJEDNICA DVIJE KOMISIJE SAVEZA

U Općini Stari Grad Sarajevo, 26. maja/svibnja održana je zajednička sjednica Komisije za razvoj i unapređenje lokalne samouprave i Komisije za propise i statut Saveza općina i gradova Federacije BiH.

Sjednice, koje su održane zajedno, vodili su Diana Salihbegović, zamjenica predsjedavajućeg Komisije za razvoj i unapređenje lokalne samouprave i Predrag Šupljeglav, zamjenik predsjedavajućeg Komisije za ustavna i zakonodavna pitanja.

Razmatrane su inicijative Općine Jajce o izmjeni Zakona o matičnim knjigama, Općine Tuzla o izmjenama Zakona o upravnom postupku, Općinskog vijeća Banovići o izmjenama Zakona o parničnom postupku, te Nacrt zaključaka Skupštine Saveza općina i gradova FBiH o kojima će se raspravljati na predstojećoj sjednici Skupštini zakazanoj za 9. juni/lipanj u Neumu.



Komisije nisu podržale inicijativu za izmjenu Zakona o matičnim knjigama, već se predlaže Predsjedništvu da donese zaključak da se svim jedinicama lokalne samouprave uputi Preporuka da se u potpunosti ispoštuje član 72a. Zakona o matičnim knjigama. Inicijative o promjenama Zakona o upravnom postupku i Zakona o parničnom postupku su podržane s prijedlogom Predsjedništvu Saveza da i uputi prema Federalnom ministarstvu pravde. Osim toga, komisije su podržale i nacrt zaključaka Skupštine Saveza općina i gradova FBiH i predložile njihovo usvajanje na predstojećoj Skupštini u Neumu.

PREDSTAVNICI SAVEZA UČESTVOVALI U RADU 10. SKUPŠTINE NALAS-a

Bugarski grad Plovdiv, od 16. do 19. maja/svibnja bio je domaćin velikog broja načelnika iz zemalja jugoistočne Evrope. Povod je bio održavanje Foruma lokalnih vlasti jugoistočne Evrope, 17. maja/svibnja, te Konferencije "Nadležnosti i spremnost lokalnih vlasti iz jugoistočne Evrope za prevenciju rizika i upravljanje kriznim situacijama usljed prirodnih nepogoda" i 10. Generalne skupštine Mreže asocijacija lokalnih vlasti jugoistočne Evrope (NALAS - Network of Associations of Local Authorities of South East Europe), koji su održani 18. maja/svibnja.

Skupština NALAS-a okuplja predstavnike 15 asocijacija lokalnih vlasti iz 12 država jugoistočne Evrope (Slovenije, Hrvatske, Bosne i Hercegovine, Crne Gore, Srbije, Kosova, Makedonije, Albanije, Bugarske, Rumunjske, Moldavije i Turske), a Savez općina i gradova Federacije Bosne i Hercegovine je predstavljao Ivo Jerkić, predsjednik Predsjedništva Saveza, te delegati u Skupštini NALAS-a Ivan Vukadin, načelnik Općine Tomislavgrad i Edis Dervišagić, načelnik Općine Gradačac.





Uz usvajanje Godišnjeg izvještaja o radu za proteklu godinu i Plana rada za 2015., usvojena je i izmijenjena Statut na način da omogućava dugoročnije promišljanje i organiziranje njegovih aktivnosti. Izabrano je i novo rukovodstvo po ustaljenom sistemu rotacije koji omogućava ravnopravnu zastupljenost svih asocijacija učlanjenih u ovu organizaciju putem jednogodišnjeg predsjedavanja. Nalas je dobio i novoga pridruženog člana, Udrugu gradova Republike Austrije.

USKORO POSEBNA WEB STRANICA ZA INVESTIRANJE U KAKNJU

U protekle dvije godine u Kaknju traje odlučna borba za investicije, a brojne olakšice za investitore i potpuni zaokret u pogledu pristupa investitorima već pokazuju odlične rezultate.

Nakon početka pripremnih radova za



izgradnju fabrike za preradu nusproizvoda životinjskog porijekla u koju će zagrebačka "Agroproteinka" investirati 20 miliona KM, izgradnje fabrike madraca, najave izgradnje tri nova proizvodna pogona na lokaciji Poduzetničke zone "Vrtlište", u Kakanj će Mesna industrija „Bajra“ iz Travnika investirati 50 miliona KM, a gradit će proizvodne pogone i stvoriti veliki broj radnih mjesta.

Općina Kakanj u 2015. godini intenzivirat će svoje aktivnosti na privlačenju investicija i u tu svrhu priprema posebnu web-stranicu namijenjenu investitorima, kao i investicijski vodič sa svim informacijama koji su potrebne investitorima, navodi se na internet stranici Općine Kakanj.

Načelnik Općine Kakanj Nermin Mandra kazao je da on lično sa saradnicima iz Službe za privredu učestvuje u pribavljanju odobrenja i druge dokumentacije potrebne za realizaciju investicije.

"Naše opredjeljenje je da uvijek i u svakoj prilici budemo na usluzi investitorima, da umjesto njih rješavamo administrativne poslove i procedure, konstantno im obezbjeđujemo pogodnosti za investiranje i nudimo im olakšice. Pozivam i druge investitore da dođu u Kakanj. Naša vrata uvijek su otvorena za investitore bez potrebe za protokolarnim najavama i sl. U slučaju dolaska investitora ja i moji saradnici odgađamo sve druge obaveze, lično učestvujemo, i ja i moji saradnici iz Službe za privredu, u pribavljanju odobrenja i druge dokumentacije koja je potreba za realizaciju investicije", rekao je načelnik Općine Kakanj Nermin Mandra.

Za gradnju objekata u Kaknju investitorima pripada poticaj u vidu povrata novčanih sredstava od naknade koja se obračunava za rentu i naknade za uređenje gradskog građevinskog zemljišta. Osim toga, pravo na poticaj u vidu oslobođanja od plaćanja naknade za korištenje gradskog građevinskog zemljišta i komunalne naknade stiže investitor za parcelu na kojoj gradi objekat u periodu od 5 godina od dana pribavljanja odobrenja za upotrebu objekta.

Odlukom o općinskim taksama na istaknutu firmu određeno je i umanjenje visine taksi u većini djelatnosti, te oslobođanje pojedinih taksenih obveznika u potpunosti ili za određeni period.

Takseni obveznici koji su počeli sa obavljanjem registrirane djelatnosti u toku tekuće godine oslobođaju se plaćanja takse na istaknutu firmu za tu godinu.

Pored ovog oslobođanja, od obaveze plaćanja takse oslobođena su pravna i fizička lica koja registriraju proizvodne djelatnosti, za prvu godinu 100 %, a za drugu godinu 50 % od ukupnog iznosa taksene obaveze.

Općina Kakanj kontinuirano radi i na pripremi lokacija koje su pogodne za realizaciju poduzetničkih inicijativa.



Kakanj



Grb Općine Kakanj

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



POTPISAN SPORAZUM O SURADNJI OPĆINE G.VAKUF-USKOPLJE I MAĐARSKE OPĆINE PAKS

Sporazum o suradnji između Općine Gornji Vakuf – Uskoplje i lokalne samouprave Paks (Mađarska) potpisan je 22. maja/svibnja u prostorijama općine Gornji Vakuf – Uskoplje. Sporazum su potpisali, u ime Općine Paks gradonačelnik Süli János, a u ime Općine Gornji Vakuf – Uskoplje, općinski načelnik Sead Čaušević.

Prema odredbama Sporazuma, suradnja između općina će se razvijati na temelju zajedničkih interesa i razvoja ekonomskog i društvenog života u zajednički odabranim područjima, a naročito na :

- električnu mobilnost,
- razvoj industrijskog parka,
- prikupljanje i tretman otpada,
- upravljanje pitkom vodom i prečišćavanje otpadnih voda,
- poljoprivredu (uzgoj voće i povrće).

U okviru ovog sporazuma potpisan je i Program aktivnosti za 2015. godinu koji predviđa nekoliko stavki koje bi se trebale realizirati već ove godine, a uključuju: Razmjenu iskustava o ulozi regija, Razmjenu i sumiraje podataka o regionalnom razvoju, regionalnoj demokraciji, jednakosti, mogućnosti i konkurentnosti, na području EU, Ekonomski razvoj, rast i projekte za stvaranja novih radnih mjesta, Razmjenu stručnjaka, Suradnju u obrazovanju i Kulturnu razmjenu.

Paks je grad u okrugu Tolna, na obalama Dunava, oko 110 km južno od Budimpešte. Površina općine je 154,08 km², a po popisu iz 2001 godine u općini Paks je živjelo 19.833 stanovnika.

U blizini grada (na 5 km udaljenosti) nalazi se jedina mađarska nuklearna elektrana koja ima 4 nuklearna reaktora, te zadovoljava oko 43% potreba električne energije u Mađarskoj, a reaktori su puštani u rad između 1982. i 1987. godine.

Pregovori o izgradnji još dva bloka ove nuklearne centrale se ovih dana privode kraju, a mađarski mediji procjenjuju da je riječ o investiciji od oko 10 milijardi eura, i to bi bila najveća investicija u Mađarskoj od pada komunizma.



Sa potpisivanja Sporazuma o suradnji



KAKO OPĆINE ŠTEDE ENERGIJU: MALIM PROJEKTIMA DO VELIKIH UŠTEDA

Energetska efikasnost zadnjih godina tema je broj jedan u bh. općinama. Da je to zaista tako potvrđuje primjer Općine Bosanska Krupa, koja sama ili uz pomoć drugih, već nekoliko godina aktivno radi na projektima energetske efikasnosti, čiji je cilj ušteda energenata pa samim tim i novčanih sredstava, kazao je za poslovni portal eKapija.ba Kasim Šertović, glasnogovornik Općine.

"Radimo onoliko koliko smo u mogućnosti. U tome su nam do sada pomagali resorna kantonalna i federalna ministarstva, UNDP - Razvojni program Ujedinjenih nacija i Vlada Japana. Mi radimo projekte, šaljemo gdje god priliku za to imamo i nadamo se pozitivnim odgovorima", kaže Šertović, naglašavajući kako je Općini vrlo teško da sama realizuje projekte energetske efikasnosti jer oni mnogo koštaju. Stoga se nadaju da će u budućnosti imati još značajniju podršku viših nivoa vlasti, ali i organizacija te će pojačati aktivnosti, jer planova je puno.

Dosadašnji realizirani projekti odnosili su se isključivo na javne ustanove, prvenstveno škole na području općine, odnosno projekte ugradnje kotlovnice, centralnog grijanja, izradu termičke fasade i krova koji je implementiran na objektu Doma zdravlja, Općinskog vijeća, Dječijeg obdaništa i doma učenika, Prvoj osnovnoj školi, Drugoj osnovnoj školi gdje je skoro zamijenjena kotlovnica, Osnovnoj školi Jezerski i Osnovnoj školi Mahmić Selo.

"Posebnost ovim projektima daje i činjenica da ih pomažu mještani, roditelji učenika. Takav je slučaj recimo sa školom u Jezerskom", kaže Šertović, navodeći kako je vrijednost kompletnog projekta iznosila preko 200.000 KM, a osim Vlade Japana i Općine, učešće u njegovom finansiranju uzelo je i Vijeće roditelja koje je zapravo i pokrenulo inicijativu. Šertović ističe kako je na sve ove pomenute projekte utrošeno preko 600.000 KM.





KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

Majske poplave po ovim procjenama zahvatile su 1/4 teritorije naše zemlje nanijevši štete u iznosu od 1,67 milijardi dolara. Pod vodom je bilo nekoliko hiljada domova u 24 poplavljene lokalne zajednice, a aktiviralo se više od 3000 klizišta...

U narednom period plan je da se energetska efikasnost poveća u svim preostalim javnim ustanovama. "Svakako, i dalje će na prvom mjestu biti školski objekti. Imamo potpisan ugovor sa Razvojnim programom Ujedinjenih nacija i Ministarstvom za građenje, prostorno uređenje i zaštitu okoliša USK za sredstva koja ćemo utrošiti na ugradnju vanjske stolarije, izradu fasade i izolaciju krova na objektu Druge osnovne škole. Sve će koštati oko 250.000, od toga Općina Bosanska Krupa osigurati će 50.000. Kada zadovoljimo potrebe sve djece, učenika, prostorije u kojima pohađaju nastavu učinimo ljepšima i toplijima, a za to će trebati mnogo vremena, onda nastavljamo dalje, u kojem pravcu vidjet ćemo. Ideja i potreba sigurno neće faliti", dodaje on.

Kaže kako uštede energije zahvaljujući ovim projektima nisu uopšte zanemarljive.

"Dom zdravlja u koji je utrošeno oko 80.000 KM, u prve dvije godine samo kroz te uštede uspio je otplatiti cijelu investiciju. To je zaista vrlo značajan podatak koji dovoljno govori o potrebi za ovakvim projektima i njihovoj isplativosti", zaključuje Šertović.

Na energetske efikasnosti Općina Posušje radi kontinuirano godinama, sukladno finansijskim mogućnostima, kaže za eKapija.ba koordinator razvojnih projekata u Općini Ivan Miličević.

"U strategiji razvoja imamo: Mjera: 3.4.1. Edukacija i promocija energetske efikasnosti; Projekt: 3.4.2. grijanje škola i JU na obnovljiv energent. Imamo u planu sve osnovne škole i sve javne ustanove 'obučiti' u termofasade, educirati mlade i djecu i građane o svim mogućim načinima edukacije uštede resursa i energenata, a na autobusnim stajalištima (za školske autobuse) imamo edukativne plakate", kaže Miličević.

Kaže kako su u okviru energetske efikasnosti već u svim osnovnim školama zamijenili kotlovnice za centralno grijanja sa lož ulja na drva.

"U novoj Osnovnoj školi Posušje sada je na redu izrada termofasade", kaže Miličević, napominjući kako su realizirali i jedan edukativni projekt osvještavanja mladih, djece i građana.

Sa projektima energetske efikasnosti nastavljaju, zamjenom kotlovnice (biomasa-drva i pelet) ostvarili su uštede od 100.000 KM na godišnjoj razini.

Izvor: eKapija.BA, 27.5.2015

ODRŽANA KONFERENCIJA: KAKO ŽIVJETI SA POPLAVAMA?

Nevladina organizacija „Tolerancijom protiv različitosti” - ToPeeR i Regionalna Reprezentativna Grupa (ReeRGe) Sliva rijeke Bosne, u Doboju je, uz prisustvo oko stotinu učesnika iz nekoliko lokalnih zajednica, civilnog društva, medija, vjerskih zajednica i poslovnog sektora iz zemlje i okruženja organizovala naučnu konferenciju na temu „Živjeti sa poplavama i kako se zaštititi od njih”.



U svojstvu domaćina Snežana Šešlija iz NVO Topeer je kazala da se naučna konferencija održava u okviru projekta PRO-Budućnost, koju uz finansijsku pomoć Američke agencije za međunarodni razvoj (USAID), implementira Catholic Relief Services (CRS) u saradnji sa Fondacijom Mozaik, Caritasom Biskupske konferencije Bosne i Hercegovine, Forumom građana Tuzla i Helsinškim parlamentom građana Banja Luka. Ona je u uvodnom dijelu istakla da je cilj ovog naučnog skupa da ponudi osavremenjeno shvatanje održivog razvoja i kako graditi naselja pored rijeke uz koegzistenciju sa prirodom, njenim resursima i čudima, da izgradnja i funkcionisanje gradova obuhvata sve prirodne sisteme sa kojima dolazi u međuzavisnost, a ne samo brigu o saobraćajnoj strukturi i građevinskom materijalu. „Samo racionalna upotreba prirodnih resursa i odgovorno upravljanje izgrađenom kao i neizgrađenom sredinom na ekološkim principima, može doprinjeti očuvanju prirode, smanjenju energetske potrošnje i povećanju kvaliteta urbane, a time i životne sredine“, istakla je u izlaganju Šešlija.

U obraćanju prisutnima zamjenik gradonačelnika Doboja Dragan Vasilčić je podcrtao važnost održavanja ove konferencije gdje će se razmijeniti životna iskustva i naučna saznanja sa osvrtom na probleme vodosnabdjevanja i ostalim prisutnim ekološkim rizicima u urbanoj sredini, posebno rizicima od poplava i klizišta. „Grad Doboje je u posljednjih godinu dana preduzeo i preduzima niz mjera i aktivnosti na sanaciji i preventivnom djelovanju na zaštiti grada od eventualnih budućih poplava i klizišta, a nedavna aktivnost je i usvajanje i izrada glavnog projekta za uređenje dijela korita rijeke Bosne u vrijednosti od oko 25 miliona KM zašto se trebaju prikupiti sredstva“, naglasio je Vasilčić i dodao da će se grad obratiti svim nadležnim entitetskim, državnim i međunarodnim



organima kako bi se on i relizovao, a time poboljšala odbrana grada od poplava. Ova investicija pod uslovom obezbjeđenja sredstava mogla bi se završiti u roku od dvije godine.

Prof.dr. Tarik Kupusović iz Instituta za hidrotehniku Građevinskog fakulteta Sarajevo, inače istraživač voditelj i koordinater mnogih međunarodnih i domaćih projekata govorio je o

problemima organizacije za vrijeme poplava po principima EU, sa osvrtom na suprotstavljane budućim poplavama. Jasna Lukić i Zdravko Kršmanović, poslanici u NSRS-a, članovi Anketnog odbora koji ima zadatak da istraži reakciju nadležnih institucija tokom prošlogodišnjih katastrofalnih poplava predložili su plan djelovanja ovog odbora, naglasivši da će se imenom prozivati odgovorni za brojne propuste za vrijeme poplava gdje je čak u Doboju bilo jedanaest izgubljenih života. "Ići ćemo do kraja, na bazi činjenica koje ćemo sigurno do u detalje isprovjeravati, po cijenu podnošenja tužbi protiv odgovornih pojedinaca", naglasio je Kršmanović. Na ovu temu (analiza stanja svake prispjele donacije) govorili su opredstavnici Centra civilnih inicijativa (CCI) koji su zajedno sa 28 NVO uključeni u program "Branat" koji će se prezentirati krajem idućeg mjeseca. Oni su iz izvještaja stranih donatora detaljno prezentirali prispjela sredstva od međunarodnih organizacija koja su nakon poplave stizala u BiH. Majske poplave po ovim procjenama zahvatile su 1/4 teritorije naše zemlje nanijevši štete u iznosu od 1,67 milijardi dolara. Obnova oštećenog i revitalizacija života za milion osoba pogođenih poplavama i klizištima je jedan od najvećih izazova. Pod vodom je bilo nekoliko hiljada domova u 24 poplavljene lokalne zajednice, a aktiviralo se više od 3000 klizišta od čega je 51 klizište u minskim poljima, a 150 ih je oštetilo putne komunikacije. U programima oporavka od poplava više je projekata od strane UN-a, EU i lokalnih vlasti. Sumnje u utrošak donatorskih sredstava postoje, jer su po izjavama učesnika neka sredstva trošena nenamjenski, počev od začepljanja budžetskih rupa do izbornih kampanja. Upravljanje rizicima od poplava i klizišta zahtjeva široko djelovanje i punu odgovornost svih u ovoj zemlji, gdje se ne smije dovesti, kao što je to bio slučaj sa majskim poplavama do institucionalne neefikasnosti, kazali su iz CCI-a.

Vujadin Blagojević iz Zavoda za poljoprivredu RS-a i jedan od projekatanta, prezentovao je projekat zaštite grada Doboja od poplava o čemu je govorio zamjenik gradonačelnika Dragan Vasilić. "Ovo je vrlo složen zahvat koji se mora uklapati u Strategiju razvoja grada. Ako se zna da je u narednom periodu na r.Bosni planirana izgradnja šest mini hidrocentrala o čemu postoji inicijativa i projekti u koje je Norveški partner Tehnoreneryas uložio 25 miliona maraka, te izvjesna izgradnja budućeg koridora V-C dolinom r.Bosne, to zahtjeva multidisciplinarni pristup", istakao je Blagojević.

Ova konferencija ponudila je dvije panel diskusije. Jedna na temu naučno-stručnog pristupa ovim izazovima sa akcentom na ulogu svih nivoa vlasti, počev od mjesnih zajednica do državnog nivoa gdje se mora zajednički djelovati, primjenom legistlative, razmjenom iskustava i informacija, preciznim načinom trošenja namjenskih sredstava, do treninga i uvježbavanja odgovornih ljudi iz sfere planiranja i priprema za moguće elementarne nepogode u šta obavezno treba uključivati sve nosioce izvršnih, zakonodavnih i predstavničkih vlasti, bezbjednosne strukture, volontere, MZ, članove etažnih vlasnike i sve druge građane. Druga panel diskusija se odnosila na definisanje odgovornosti, pojedinačnih i kolektivnih kada su u pitanju ovakva dešavanja. Penzionisani univerzitetski profesor dr. Zijad Bešlić je reagovao na naslovnu temu konferencije kazavši da je ona morbidna. "Zašto se ne govori kako živjeti bez poplava?" On se kritički osvrnuo na postpoplavno stanje zdravlja ljudi zahvaćenih ovom nesrećom kazavši da ovdje treba provesti ozbiljna istraživanja, jer osim direktnog stradanja ljudi od nabujalih voda gušenjem, posljedice poput trauma, ili iznenadnih srčanih udara zbog stresova su jako prisutne.

Na kraju konferencije prisutnima se obratila Koordinator projekta, gospođa Danijela Stojković-Jovanović, ispred NVO „Svet i Dunav“ iz Srbije sa temom „Dunavska strategija - osnovni pravci i načini učešća civilnog sektora u implementaciji Dunavske strategije“, na čiju realizaciju se obavezalo 14 zemalja Dunavskog sliva. NVO „Svet i Dunav“ ima 130 članica iz 14 zemalja. Od samog početka djelovanja njihova misija je određena geopolitičkim poimanjem velike Evropske rijeke Dunav koja je za sve zemlje kroz koje ona protiče i građane koji žive uz ovu rijeku trajna ljubav i izvor života. Danijela Stojković-Jovanović je pozvala sve BH NVO koje se bave ovakvom ili sličnom tematikom na saradnju i razmjenu dobrih praksi i iskustava na čemu joj se u ime domaćina ove konferencije NVO „ToPeer“ Doboj zahvalila Snežana Šešlija.

Miralem BEGIĆ, Viši samostalni referent za informisanje Općina Doboja Jug

"Upravljanje rizicima od poplava i klizišta zahtjeva široko djelovanje i punu odgovornost svih u ovoj zemlji, gdje se ne smije dovesti, kao što je to bio slučaj sa majskim poplavama do institucionalne neefikasnosti, kazali su iz CCI-a."

POZIV OPĆINSKIM / GRADSKIM VIJEĆIMA ZA KANDIDOVANJE NAJBOLJIH PRAKSI

U okviru projekta „Podrška savezima općina i gradova“ - AMCS predviđeno je da se svake godine vrši izbor za primjere najbolje prakse kada je u pitanju funkcionisanje općinskih/gradskih vijeća. U skladu s tim, Savez općina i gradova Federacije BiH pozvao je sve jedinice lokalne samouprave da, u skladu sa Standardima rada općinskih/gradskih vijeća izvrše samoprocjenu svog rada i dostave Savezu primjere svoje dobre prakse. Takođe, pozvana su i vijeća da, ukoliko imaju prakse koje predstavljaju inovativna rješenja i nadilaze standarde i kriterije funkcionisanja i rada općinskih/gradskih vijeća te primjere dostave Savezu. Nakon procesa odabira, najbolji primjeri će biti predstavljeni na konferenciji predsjedavajućih i sekretara vijeća i biće dostupni na web stranici Saveza. Kandidujući najbolje primjere iz prakse, jedinice lokalne samouprave imaju priliku da i drugima pokažu istu i predstave inovativna rješenja u radu općinskih/gradskih vijeća. Na ovaj način, jedinice lokalne samouprave pomažu i drugima da unaprijede svoj rad u oblasti funkcionisanja vijeća. Primjere najbolje prakse mogu se dostaviti na e-mail savez@sogfbih.ba do 01. jula /srpnja 2015. godine.

KORISNI LINKOVI ZA
PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmedeu.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

U DECEMBRU "SAJAM PRIVREDE, POLJOPRIVREDE, ZANATSTVA I ROBA ŠIROKE
POTROŠNJE"

Drugi Sajam privrede, poljoprivrede, zanatstva i 39. Sajam roba široke potrošnje će se održati u periodu od 17. do 20.12.2015. godine u Sarajevu, Centar Skenderija. Riječ je o izložbeno-prodajnom sajmu specijaliziranom za mala i srednja

Sajam privrede
poljoprivrede, zanatstva
i roba široke potrošnje

17. - 20. 12. 2015.

CENTAR SKENDERIJA, SARAJEVO

preduzeća, proizvodno-prerađivačka i uslužna.

Izložbeni program obuhvata proizvode i usluge iz oblasti: Poljoprivrede (ratarstvo, stočarstvo i ribarstvo); Prehrambene industrije (mlinsko-pekarska industrija, konditorska industrija, industrija za preradu i proizvodnju ulja, industrija za preradu voća i povrća, mljekarska industrija, industrija za konzerviranje ribe, mesnoprerađivačka industrija i industrija pića); Široke potrošnje (prehrambeni proizvodi, kozmetika, kućna hemija, mali kućni aparati, računari, televizori, odeća i obuća); Proizvodnje ambalaže; Stari zanati i kućna radinost.

Pored izložbenog programa ovaj sajam je izuzetna prilika za održavanje stručno-popratnih manifestacija (okrugli stolovi, seminari, kongresi) sa aktuelnim temama iz gore navedenih oblasti, te prilika za susret i međusobno ekonomsko povezivanje, trgovinsku razmjenu, ali i mjesto za prezentovanje novih razvojnih projekata iz oblasti privrede.

Više informacija o sajmu možete dobiti putem link-a:

<http://www.skenderija.ba/index.php/sarajevskisajam/sajam-privrede>

NAJAVA OBILJEŽAVANJA DANA OPĆINA ZA MJESEC JUNI / LIPANJ I BITNI DATUMI
ZA SAVEZ

- **12. juni/lipanj - Osnovana Zajednica opština i gradova SRBiH.** Dana 12.06.1972. godine u Zenici formirana je Zajednica opština i gradova SRBiH sa ciljem unapređenja i razvoja sistema lokalne samouprave, međuopćinske i međunarodne saradnje.
- **02. juni/lipanj - Dan Općine Gračanica.** Na ovaj datum 1429. godine nastao je najstariji pisani dokument o historijskom razvoju gračaničkog kraja u kojem se spominje srednjovjekovni grad Soko, za kojeg se vezuje ime Gračanice. Naime, riječ je o ženidbenom ugovoru između kneza Radivoja i Nikole Veličkog iz 1429. godine, u kojem se Knez Radivoje sklapajući brak sa Katarinom, kćerkom slavonskog feudalca Nikole od Velike (mjesto blizu Slavonske Požege), 2. juna 1429. godine, u Budimu, obavezao da će tastu i punici Margariti, pored ostalog, pokloniti polovinu Sokola i dio svojih imanja u Bosni i Slavoniji.



Gračanica





Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Uključite Savez općina i gradova Federacije Bosne i Hercegovine na



Pratite Savez općina i gradova FBiH na



Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu proslijedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA ZA MJESEC JUNI / LIPANJ I BITNI DATUMI ZA SAVEZ

- **14. juni/lipanj - Dan Općine Novi Travnik.** Na taj dan 1949. godine Josip Broz Tito, kao predsjednik Vlade Federativne Narodne Republike Jugoslavije i ministar narodne obrane, potpisao je Rješenje o osnivanju poduzeća «Bratstvo» na poljima sela Kasapovići, današnji Novi Travnik. Uporedo sa izgradnjom tvornice krenulo se i sa izgradnjom prvih stambenih zgrada, što je s vremenom izraslo u grad.
- **16. juni/lipanj - Dan Općine Konjic.** Ovaj dan je značajan za Konjic jer predstavlja sjećanje na prvo pisano spominjanje imena Konjic iz 1382. godine.
- **19. juni/lipanj - Dan Općine Živinice.** Toga dana 1959. godine odlukom Narodne skupštine NR BiH Živinice dobijaju status općine.
- **21. juni/lipanj - Dan Općine Srebrenik.** Tog dana je 1992. godine Općina Srebrenik oslobođena.
- **24. juni/lipanj - Dan Općine Vogošća.** Za spomenuti datum se vežu dva bitna događaja iz 1953. godine, kada je Općina Vogošća prvi put u historiji uspostavljena kao institucija odnosno jedinica lokalne samouprave, i 1992. godine, tokom odbrambeno-oslobodilačkog rata kada su formirani "Vogoščanski odredi" u Vogošći.



Novi Travnik



Konjic



Živinice



Srebrenik



Vogošća